



粵海關志卷二十八

夷商三

廣東布政使潘思榘疏

伏思外夷託處內地祇圖市易通商規取歲利  
原可毋庸禁絕若如前明御史臣龐尙鵬疑其  
竊據窺伺疏請仍令撤房居船灣泊舊澳使海  
孺棲附之夷紛然失所殊屬過當第夷性類多  
貪黠其役使之黑鬼奴尤爲兇悍又有內地姦  
民竄匿其中爲之教誘唆使往往冒禁觸法桀





驚不馴凌轢居民玩視官法更或招誘愚民入  
教販買子女爲奴僕及夾帶違禁貨物出洋種  
種違犯雖經督撫臣嚴行示禁臣亦力爲整飭  
究以越在海隅未得委員專理勢難周察臣愚  
以爲外夷內附雖不必與編氓一例約束失之  
繁苛亦宜明示繩尺使之遵守查前明曾設有  
澳官後改歸縣屬至雍正八年前督臣郝玉麟  
因縣務紛繁離澳寫遠不能兼顧奏請添設香  
山縣縣丞一員駐劄前山寨就近稽查第縣丞

職分卑微不足以資彈壓仍於澳地無益似宜  
倣照理徭撫黎同知之例移駐府佐一員專理  
澳夷事務兼管督捕海防宣布

朝廷之德意申明

國家之典章凡駐澳民夷編查有法洋船出入盤  
驗以時遇有姦匪竄匿唆誘民夷鬪爭盜竊及  
販買人口私運禁物等事悉歸查察辦理通報  
查覈庶防微杜漸駐澳夷人不致蹈於匪彝長  
享

天朝樂利之休而海疆亦永荷牧安之福矣

澳門同知印光任議

乾隆九年

一洋船到日海防衙門撥給引水之人引入虎門灣泊黃埔一經投行卽著行主通事報明至貨齊回船時亦令將某日開行預報聽候盤驗出口如有違禁貨物夾帶查明詳究

一洋船進口必得內地民人帶引水道最爲緊要請責縣丞將能充引水之人詳加甄別如果殷實良民取具保甲親鄰結狀縣丞加結

申送查驗無異給發腰牌執照准充仍列冊通報查考至期出口等候限每船給引水二名一上船引入一星馳稟報縣丞申報海防衙門據文通報并移行虎門協及南海番禺一體稽查防範其有私出接引者照私渡關津律從重治罪

一澳外民夷雜處致有姦民潛入其教并違犯禁令之人竄匿潛藏宜設法查禁聽海防衙門出示曉諭凡貿易民人悉在澳夷牆外空



地搭篷市賣毋許私入澳內并不許攜帶妻室入澳責令縣丞編立保甲細加查察其從前潛入夷教民人竄匿在澳者勒限一年准其首報回籍

一澳門夷日遇有恩懇上憲之事每自繕稟浼熟識商民赴轅投遞殊爲褻越請飭該夷自凡有呈稟應由澳門縣丞申報海防衙門據詞通稟如有應具詳者具詳請示用昭體統

一夷人採買釘鐵木石各料在澳修船令該夷

目將船身丈尺數目船匠姓名開列呈報海防衙門卽喚該船匠估計實需鐵斤數目取具甘結然後給與牌票印照并報粵海關衙門給發照票在省買運回澳經由沿途地方汛弁驗照放行仍知照在澳縣丞查明如有餘剩繳官存貯倘該船所用無幾故爲多報買運希圖夾帶等弊卽嚴提夷目船匠人等訊究

一夷人寄寓澳門凡成造船隻房屋必資內地

匠作恐有不肖姦匠貪利教誘爲非請令在澳各色匠作交縣丞親查造冊編甲約束取具連環保結備案如有違犯甲鄰連坐遞年歲底列冊通繳查覈如有事故新添卽於冊內聲明

一前山寨設立海防衙門派撥弁兵彈壓番商稽查姦匪所有海防機宜均應與各協營一體聯絡相度緩急會同辦理老萬山澳門虎門黃埔一帶營汛遇有關涉海疆民夷事宜

商漁船隻出口入口一面申報本營上司一面并報海防衙門其香山虎門各協營統巡會哨日月亦應一體查報

澳門同知張汝霖議 乾隆十四年

一驅逐匪類凡有從前犯案匪類一概解回原籍安插取具親屬保鄰收管不許出境並取澳甲嗣後不敢容留結狀存案將逐過姓名列榜通衢該保長不時稽查如再潛入滋事卽時解究原籍保鄰澳甲人等一體坐罪



一稽查船艇一切在澳快艇果艇及各項蛋戶  
罟船通行確查造冊發縣編烙取各連環保  
結交著保長管束許在稅廠前大馬頭灣泊  
不許私泊他處致有偷運貨物藏匿匪竊往  
來誘賣人口及載送華人進教拜廟夷人往  
省買賣等弊每日派撥兵役四名分路巡查  
遇有潛泊他處船艇卽時稟報查拏按律究  
治失察之地保一并連坐兵役受賄故縱與  
犯同罪

一禁賒物收貨凡黑奴出市買物俱令現銀交  
易不得賒給亦不得收貨黑奴物件如敢故  
違究逐出澳

一犯夜解究嗣後華人遇夜提燈行走夷兵不  
得故意扯滅燈籠誣指犯夜其或事急倉猝  
不及提燈與初到不知夷禁者冒昧誤犯及  
原係姦民出外姦盜致被夷兵捉獲者立卽  
交送地保轉解地方官訊明犯夜情由分別  
究懲不得羈留片刻並擅自拷打違者照會

該國王嚴處

一夷犯分別解訊嗣後澳夷除犯命盜罪應斬絞者照九年定例於相驗時訊供確切將夷犯就近飭交縣丞協同夷目於該地嚴密處所加謹看守取縣丞鈐記收管備案免其交禁解勘情罪允當卽飭地方官眼同夷目依法辦理其犯該軍流徒罪人犯止將夷犯解交承審衙門在澳就近訊供交夷目分別羈禁收保聽候律議詳奉批回督同夷目發落

如止杖笞人犯檄行該夷目訊供呈覆該管衙門覈明罪名飭令夷日照擬發落

一禁私擅凌虐嗣後如有華人拖欠夷債及侵犯夷人等事該夷卽將華人稟官究追不得擅自拘禁屎牢私行鞭責違者按律治罪

一禁擅興木土澳夷房屋廟宇除將現在者逐一勘查分別造冊存案外嗣後止許修葺壞爛不得於舊有之外添建一椽一石違者以違



制律論罪房屋廟宇仍行毀拆變價入官

一禁販賣子女凡在澳華夷販賣子女者照乾隆九年詳定之例分別究擬

一禁黑奴行竊嗣後如有黑奴勾引華人行竊夷物即將華人指名呈稟地方官查究驅逐黑奴照夷法重處不得混指華人串竊擅捉拷打如黑奴偷竊華人器物該夷日嚴加查究其有應行質訊者仍將黑奴送出訊明定擬發回該夷日發落不得庇匿不解如違卽

將該夷日懲究

一禁夷匪夷娼窩藏匪類該夷日嚴禁夷匪藏匿內地犯罪匪類並查出賣姦夷娼勒令改業毋許窩留惡少賭博偷竊如敢抗違除內地犯罪匪類按律究擬外將藏匿之夷匪照知情藏匿罪人科斷窩留惡少之夷娼男婦各照犯姦例治罪如別犯賭博竊盜其罪重於宿娼者仍從重擬斷并將失於查察之夷日一并處分知情故縱者同坐



一禁夷人出澳夷人向例不准出澳奉行已久  
今多有匪夷藉打雀為名或驚擾鄉民或調  
姦婦女每滋事端殊屬違例該夷目嚴行禁  
止如敢抗違許該保甲拏送將本犯照違

制律治罪夷目分別失察故縱定擬

一禁設教澳夷原屬教門多習天主教但不許  
招授華人勾引入教致為人心風俗之害該  
夷保甲務須逐戶查明禁止毋許華人擅入  
天主教按季取結繳送倘敢故違設教從教

與保甲夷目一併究處分別驅逐出澳

謹案張汝霖所議經總督策楞覈准為漢  
番文二道勒石通衢漢夷商民咸知畏忌  
知縣張甄陶論澳門形勢狀

澳夷在粵貿遷藉以資民而桀悍亦足生事圖  
近利者視為必不得已之局懷遠慮者視為必  
不可解之憂竊以二者皆非也蓋夷人之必當  
備者三其不足備者亦三而所以制之者亦有  
三何則凡異端左道邪說旁門皆以教詐財而



夷人獨以財行教此其志不在小故所至之國無肯容留惟明之未造人心喜異利瑪竇始入售其說一時士大夫或震其歷學之精詣或眩其藝事之經奇其實疇人歷算古有專司分秒差歧亦無大害至於鳴鐘風琴響樂水車非奪天巧則不能成以利民用全無所濟徐光啓殫心水器未有施行湯若望講究火攻何嘗一試惟是壘踞澳門厯局聚徒營利而已今其立說有刊行皆下俚不足比二氏之皮毛惟以利啗

人從之日衆凡一貧民入教每歲與以十餘金又讀書識字之人入教每歲數十金又另擇頭人暗相邀結牢絡分肥爲利尤厚近年奉禁而貪昧者仍首鼠兩端非爲服教歸依只是利心難割緣西洋治世國王之外別有善世國王僧身僧服惟以行教爲事凡夷商夷僧能誘人入教者殿最多寡給其餼食以此精心煽誘凡內地之人入教彼國立明冊籍謬加秩號藉口中華信奉即可震聳諸番至其所用十字水錢不



過鉛汞煎鍊若得華人目睛點入即可成銀都無銷耗凡奉教之人臨死則夷人以布罽其面喃喃持咒懺悔乘間竊其睛以去點鉛之外雜之藥物別有奇功用之不窮術由於此事頗祕密民爲所愚卽如香山縣界各邑人民從前入唐人寺禮拜改服爲夷業經封閉今聞其弊尙未盡絕只向之入唐人寺者今入三巴寺尤顯迹可見耳稅關司稽察而民事不親同知駐前山而鞭長莫及雖有縣丞移駐官卑秩小政令

難行若稍縱容卽滋芽孽可慮者一旦夷性堅忍過人凡所規畫期於必遂如服習此藝未精卽戒子孫世世承學故其奇技淫巧若出天成實皆積思所到其謀入中土積慮尤深卽如澳門本屬紅毛賄遷之地至萬厯間始有西洋夷人雜居之不知何以潛奪默移全歸彼類曲營臺榭旁及青洲高建礮臺隱如敵國納地租卽取償地租輸關稅實未輸關稅蓋夷人所納地租僅五百兩卽將此澳內屋地租與在澳商民



每歲收租數倍其額又其貨船入口不敢稽查  
但量船身即搬入澳迨至內地商人赴買始行  
輸稅是所稅皆內地之泉流非夷人之刀布也  
雖

天朝體統不計錙銖但夷性不苦其漸姦而苦其漸  
近近日宿冬夷人住省竟不回澳即在十三行  
列屋而居危樓相望明樹番旗十字飄颺一望  
眩目雜居狎處既恐事端射利鈎奇又妨商業  
澳門在遠猶恐他虞漸入省城殊難操縱可慮

者一旦入國問禁出使從俗况在陪藩尤宜恭  
順而夷性狡陰有異於此凡觸禁網雖明知無  
所逃遁必強顏抗拒以此為能如從前鬼兵擅  
折稅館柵門抗不就逮停稅封船幾於一月桀  
驁不顧至諭澳門居民盡行遷出示以閉關遏  
糴始憂稿餓送出鬼兵懲責修柵謝罪又如封  
禁唐人寺一案先亦強抗稱願回國後經丞令  
武職各帶兵役前往諭以果願回國立即出具  
遵依以憑題達始知悔懼將寺閉封然只封其

中一座兩旁今仍如故又如前年毆斃人民公然抗匿前張丞百方勸諭始一出訊旋即領回順風揚帆徑歸本國後雖參處官吏已經招之不來又如去歲丞令通詳禁約勒碑澳地條內有不許引誘華人入教一欵必不肯從延抗多時後乃以番字碑立議事亭漢字碑立縣丞公署草草了事難馴已甚長此安窮可慮者三然而謂之不足慮者何也蓋制馭番夷在揣得其情而制其死命則自氣奪而不敢肆所謂知彼

知己上兵伐謀者也今由澳門往小西洋水程幾於半載由小西洋而歸大西洋則須過大崙山賈舶難行浩無畔岸以此來中土者多不願回即使此輩干紀伏誅該國安能爲之虐恥且以澳門地形論之由香山縣南去一百二十里前山有寨名曰蓮花相其形勢宛然惟肖蓋前山如荷根山路一線直出如莖澳地如心此外如大小十字門九洲洋雞頸頭金星山馬騮洲星羅碁布宛如花之瓣澳夷男婦共有二千餘



人如螻蛄蠕動於荷心蓮葢之中非能爲害於華嚴香海也其地不生五穀菜蔬一切仰於內地關閘堅閉立稿非難即使泥沙淺海可以潛行走漏一夫豈足爲憑澳夷知之甚審不過外強中乾以求苟免其形勢一不足慮又或謂夷舶往來歲收其利今倘操之已蹙彼則相率飄然而去不特歲額立絀而粵民之游食者亦無以爲生不知澳夷並非輸其本國之貨而販鬻於中土不過以澳門爲居貨之地以暹羅蘇祿

交趾呂宋爲行貨之地耳今考其輸稅絕無大西洋土物雖以鼻煙無用今亦累歲不來惟是錫蠟胡椒檳榔檀木之類皆由外番各國販運而來又得中土之細茶茯苓湖絲糖果之物販往各番抽其所得先輸本國之稅以養夷僧夷日夷兵又施其半入寺行教是彼方以澳爲利藪非由彼國挾鏹而至於澳從前制府題限澳船以二十五號爲額今連年澳夷失利有被風漂沒者有缺資不能營運者僅餘十號是澳船



額不止去其半矣而粵中關稅輒日增益事理  
灼然去留何損蓋該夷壟斷逐利素爲諸番所  
惡若西夷船逐漸減少則各番國亦必逐漸增  
至且彼舍澳門則厯局無灌輸之路其伎立窮  
各番無回易之途其財立匱是彼當仰命於我  
我不應有虞於彼二不足慮又或恐其矢志難  
歸遊魂島外或劫掠沿海諸寨或引誘內地人  
民不知洋夷若離澳門如魚失水現在如紅夷  
佛郎機與彼深仇一遇大洋相爲屠劊闖入內

地船笨難行至於入教姦民不過爲財起意天  
主教除不祀神祇祖先以外別無他能三不足  
慮雖然善籌國者無忘衣襖無忽蜂蠆無以未  
陰雨而弛綢繆無以已治安而遺厝火則不可  
不籌所以防微杜漸永遠久安者其策亦有三  
一曰治之以漸二曰示之以別三曰備之以豫  
何謂漸治語曰猛虎在深山百獸莫敢抗居檻  
牢之中搖尾乞憐求食積威約之漸也今夷人  
之肆久矣欲驟而馴之勢不可得是必漸以束



之使徐入吾條轂而後可從前設有海防同知雖儀衛規制頗屬赫喧其實馭夷肯綮全在行商導之立即爲非惕之易隨斂戢今同知不司稅務則不能駕馭行商通事高而無民勢不相屬今雖據暴令稟請夷舶出入必經同知點驗其實從前同知何嘗無點驗之責正如十羊九牧徒見贅疣審欲振肅紀綱莫如覈綜名實但將稅關協辦之驍騎校改用同知兼理則自然外夷內商悉就約束而小艇漏稅違禁出海入

寺奉教諸弊自除再於澳地設同知公館一所往來居住彈壓番夷稽查姦宄情既相習愛戴自生可使革心何憂不率是治之之策一曷謂示別澳夷舊有城垣爲明總制何士晉所墮今尙築有短垣一帶垣以下係望夏莊今縣丞所駐空無居人垣以內則澳夷之居華人雜入其中賃屋營生租旣歸夷又日滋釁從前有遷民出澳之語詳牘雖在託之空言今若暫請將關稅贏餘酌給一二萬金搭造官店賃與澳民初



年免租以爲遷徙之費次年以後將租抵稅十載可完十載以後歲收其利審能行此有數利焉夷人居樓上賃華人居下體統倒置遷則可免一也夷人最重夜禁而華人好爲夤夜往來易於挑釁啓侮遷出則不相涉二也盜賊無自竄入擾害夷人三也漢姦無因拐誘夷婦四也且百物工匠皆在澳外夷每事俯命於我何敢跳梁勝於以口舌爭五也此治之之策二曷謂備豫今粵人談澳夷輒爲變色不知如佛郎機

紅毛皆非善類而內泊黃埔尤近肘腋此地迫居省會無用設官請倣閩省海關之例番舶入境起柁封銃開船之日給還出口仍請照會各國夷王令自行曉諭一年之後如例遵行則規制森嚴可保永遠無事是治之之策三也雖現今

**德**威宣暢中外同風何庸長慮卻顧然欲觀未然而彌後患其策實不外此雖事關重大非敢以卽見之施行或者千慮之愚足資采擇



知縣張甄陶上制澳夷狀

一澳門設有海防同知專司彈壓番夷規制頗爲鄭重其實事權不屬夷惟桀驁如初且未設此官之前該地離香城窈遠一切事可已夷漢各不生心自設此官專司澳務其內地之法不得行於夷而夷人之事皆得責於我轉之多事又其駐劄衙門在前山寨內離澳地十三里凡事不聞不見不過委之駐澳縣丞此官幾於虛設雖有標兵一百把總二員

稽查夷船出入其實夷船只由關部稽查同知兵役不登船查驗不過照依關部稟報具文而已伏思澳夷之犯法負固皆其夷目爲之與澳夷無與因澳夷但知有夷目而不知有

天朝之官是以聽夷目之驅遣今欲束以條鈐而馴其血氣宜使合澳夷人漸知有

國法之可遵官吏之可恃則自漸有知識不聽夷目之驅遣而夷目亦不得借其氣勢以自張

應將稅關委員改用同知料理則一切番舶出入皆聽同知之稽查而一切情形無不瞭於同知之意內而又視其欲惡爲之調劑則其心彌復歸向雖復夷目迫之附己亦不肯從夷目失衆夷之助自然不敢恣肆十數年後可使就繩約如內地語云虎噬人而媚養己者順也或疑夷性難測不宜以同知迫處恐有意外之事而縣丞驍騎校亦皆職官雜居已久何嘗滋事哉

一澳夷言語不通必須通事傳譯歷來俱以在澳行商傳宣言語該商人之鼻息兩相浹洽言語易從後於設立同知定議章程之時內有將同知標兵撥出二名充爲通事一條商人卽欲卸責地方而標兵充當通事旣與澳夷不相諳熟不能得澳夷要領且人微言輕反以啓侮更或侵漁生事關係非輕仍請照前用洋商通事乃商人視爲畏途多方推諉此件頗爲馭夷樞要用商人則夷人曲折無



不諳曉用兵役則此輩無知反視夷人爲奇貨滋事作姦其弊無窮况商人之當通事猶民人之充當地保按年輪換不過暫時答應非有苦累不可聽其置身事外蓋澳夷惟利是知別無瞻顧商人服飾麗都錢財充扱可以取重於夷人又平日夷人孰良孰莠孰富孰貧無不周知斷不宜驟易生手兵役致傳譯不通事有窒礙

一向來各番從無帶人口入內地之例近來乃

有一二番舶將婦女載入內地經前制憲行司查議許其寄搭澳門居住回船仍載出口蓋恐番婦在行民夷雜處恐滋意外澳門則夷人氣類相通別無嫌忌也不知澳夷性情黠巧與各番不同凡澳夷與番夷欲其離不欲其合何則凡關部之例各番船俱由東莞虎門入口卽時赴關上稅每番船一隻上稅二三萬金不等惟澳夷之船則由十字門入口收泊澳門並不向關上稅先將貨搬入澳

自行抽收以充番官番兵俸餉又有羨餘則解回本國至十三行商人赴澳承買然後赴關上稅是所稅乃商人之稅與澳夷無與又則例甚輕每一船不過收稅三四千金不等故澳夷得住澳之後震誇諸國以澳門地圖爲寶近年以來天主教不行該國夷王不肯輸財於澳澳夷漸以困苦所有題定洋船照私賃呂宋夷船影射入澳均分其利者其跡甚祕無可尋求猶幸各番與澳夷不睦尙未

有勾通之路且澳夷藐視諸番不相款洽今若聽各番得以婦女入澳則由寄頓而探視由探視而親熱萬一鑿破混沌將澳船名號賃與各番則澳門添數船於稅額不增外番漏一船則於稅有缺海關每船少萬餘金之稅則澳夷輒增數萬金之利關係非小請於現在洋船回空之時嚴諭以後不許攜帶婦女入口萬一仍有無知番人將婦女入口者卽責令行家看守以洋行住一番婦料無大



事不可聽其寄頓澳門以爲交通捷徑

一澳門雖爲地無幾然夷人入住多年專以行教爲事其志實不在小蓋由該國有二王一曰善世國王係屬僧身一曰治世國王係屬民身僧王氣勢在民王之上專以行教爲事如聞中土奉教者衆則源源輸財而至澳中始得饒富澳中舊有唐人廟一所唐人奉教者皆入廟禮拜凡香山順德新會東莞南海番禺沿海嗜利之徒多人其教至乾隆九年

香山令張汝霖始詳請將廟封閉大費心力始克遂事此後各處奉教民人始不敢至唐人廟禮拜然聞尙有竟至三巴寺禮拜者此爲禁戢夷人之根柢但令其教不行則氣勢自然衰止仍請飭沿海各附近澳門州縣每年將不許陰行奉教及偷至三巴寺禮拜事由禁諭一次其禮拜之期在冬至前後仍飭澳門同知嚴緊稽查但邪教永永不行則此等夷人久之又久亦與內地耕鑿之民同安

無事矣

部覆兩廣總督李侍堯議

乾隆二十四年

一據稱夷商在省住冬應請永行禁止也外洋夷船向係五六月收泊九十月歸國卽間有因事住冬亦在澳門居住乃近來多有藉稱貨物未銷潛留省會難免勾結生事請嗣後夷船到粵銷貨後令其依限回國卽有行欠未清亦應在澳門居住將貨物交行代售下年順搭回國查粵東貿易夷船其自進口以

至歸掉原有定期本不許潛留內地近因行商等或有掛欠未清以致該夷商等藉詞遷延留寓省會希圖探聽各省貨價置買獲利而內地民人亦遂有誘令誑騙者今該督請於銷貨歸本後依期隨同原船回國則該夷商等不得藉詞逗遛而內地商民亦不得往來交接貨緣爲姦自屬立法制防之道應如所請辦理但夷商等旣依期歸掉一切銷貨歸價自應責成殷商公平速售按期清楚不



得任意拖欠卽有零星貨物未經銷完伊等  
交易年欠自不無遞年通融搭銷帶還之處  
但能信實相安彼此不致苦累原可無庸繩  
以官法若令該夷按年歸國將貨物交行商  
代售其中不肖行商知其勢難久待或有意  
稽留壓滯有所不免嗣後遇有此等情弊一  
經告發地方官應將姦商按律處治毋庸稍  
有寬貸其夷商有因行貨未清情願暫留澳  
門居住者聽其自便毋庸概勒歸國以免擾

累

一據稱夷人到粵宜令寓居行商管束稽查也  
歷來夷商到廣俱係寓歇行商館內乃近來  
嗜利之徒多將房屋改造華麗招留夷商圖  
得厚租任聽漢姦出入教唆引誘縱令出外  
開行以致私行交易走漏稅餉無弊不作請  
嗣後凡非開洋行之家概不許寓歇其買賣  
貨物必令行商經手方許交易如有縱夷人  
出入以致作姦犯法者分別究擬地方官不

實力稽查飭禁一併參處查夷商到粵寓歇  
行商館內稽查管束原不許任意出入若非  
官充行商招引投寓不獨勾引出入無從覺  
察而交易貨物多寡不經行商通事之手更  
滋弊竇應如該督所請嗣後令夷商歇寓責  
成現充行商館內送寓居住加謹管束房屋  
或有不敷並令行商自行租賃撥人照看毋  
許出入漢姦私相交易但行商等不得以操  
縱在己遂有把持短價勒指並令地方官留  
心訪察嚴加查禁則姦貨既可永杜而遠夷  
亦不致苦累矣

一據稱借領外夷資本及雇倩漢人役使並應  
查禁也查近年夷商多將所餘資本雇倩內  
地經營之人立約承領出省販運則本地行  
店亦向伊借領本銀生息互相勾結請嗣後  
內地民人倘敢故違將借領之人從重究擬  
查向來夷商到粵貿易祇許將帶來貨物售  
賣置買別貨回國其應禁止出洋之貨概不



得私行販運近來內地行店民人多有借夷商資本貿販冀沾餘潤致有劉亞遍等之徒借領謀利教唆滋事於地方甚有關係應如該督所請令借領資本之行商人等據實首明勒限清還免其究擬嗣後倘有違禁借貸勾結者照交結外國借貸誑騙財物例問擬所借之銀查追入官至夷商所帶番廝人等足供役使原不得雇內地民人此後設立買辦通事外如有無賴民人貪財受雇聽其指使服役者應交地方官飭諭通事行商實力嚴查禁止倘有徇縱一併懲治

一據稱外夷雇人傳遞信息之積弊宜請永除也夷商購買貨物分遣多人前往浙江等省不時雇覓千里馬往來探聽貨價低昂卽如汪聖儀之案<sub>臣</sub>等所發牌單公文尙未遞到該犯先已得信逃避又如欽天監劉松齡等兩次奏請方守義等願赴京效力俱以澳門來信爲詞皆由內地民人代爲傳齎信息請

永行停止查外來夷商投行交易自不得任其藉詞探聽雇倩脚夫傳遞消息以致內地姦商往來交結此等積習亟宜革除應如該督所請嚴諭行商脚夫人等嗣後一切事務俱呈地方官聽其酌量查辦如有不遵禁約仍前雇倩往來卽將代爲雇覓及遞送之人一併嚴拏究治至西洋人寄住澳門遇有公務轉送欽天監應飭令夷目呈明海防同知轉詳督臣分別咨奏之處亦應如該督所請

辦理

一據稱夷船進泊處應請酌撥營員彈壓稽查

也夷船進口之後向係收泊黃埔地方每船夷梢多至百餘名或二百名不等均應防範向例酌撥廣州協標外委帶兵搭寮防守但外委職分卑微不足以資彈壓請嗣後於

臣

標候補守備內酌撥一員督同稽查其米薪日用請於粵海關平餘項下每月酌給銀八兩并令附近之新塘營酌撥槳船一隻與該



處原設左翼鎮中軍槳船會同稽察俟洋船出口卽行撤回查夷船收泊所帶夷梢爲數衆多種類各別性多暴悍易於滋事行兇而內地姦民蛋戶復爲勾引均所不免自應嚴行防範不致滋生事端今該督旣稱向派廣州協外委一員帶兵十二名不足以資彈壓應准其於督標內揀派候補守備一員專駐該處督同守寮弁兵實力防範稽查其候補人員例無廉俸所有每月酌給銀八兩之處

亦應如該督所請准其於海關平餘項下酌量撥給并酌撥槳船會同巡邏彈壓至所撥弁兵俟夷船進口派往出口撤回如有巡防疎懈或致生事該管上司卽嚴行參處

兩廣總督百齡監督常顯議

嘉慶十四年

查從前議奏防範規條本爲詳備因日久玩生致滋弊竇除再申明例禁督令切實奉行外至於今昔情形不同有應隨時增易者謹分晰數條

一外夷兵船應停泊外洋以肅邊防也查外夷來廣貿易先將貨船停泊零丁等處外洋報明引進黃埔河面以便查驗開艙從不許護貨之兵船駛入內港近年以來漸不恪守舊章應請嗣後各國貨船到時無論所帶護貨兵船大小概不許擅入十字門及虎門各海口如敢違例擅進經守口員弁報明卽行驅逐一面停止貿易

一各國夷商止准暫留司事之人經理貨帳餘飭依期歸還不許在澳逗遛也查外夷商船向係每年五六月收泊九十月歸國該夷商或因貨物未銷或有行商掛欠未清向准在粵海關請照下澳暫寓住冬仍俟行帳算明卽於次年催令回國邇來該夷等竟有在澳久居遷延不去者名數較多且種類不一誠恐別滋事端嗣後各夷商如銷貨歸本後令其依期隨同原船歸國不得在澳逗遛卽有行欠未清止准酌留司事者一二名在澳住



冬清理責令西洋夷目及洋行商人將留澳夷人姓名造冊申報總督及粵海關衙門存案俟次年卽令歸國亦申報查考如敢任意久住或人數增多查出卽驅逐

一澳內華夷宜分別稽查也查澳內西洋人房屋自乾隆十四年議定章程止許修葺不許添造嗣因西洋夷人生齒日繁以致屋宇逐漸增添至澳內華人原議不准攜帶妻室以杜販賣子女之弊嗣因西洋夷目呈稱華夷

貿易惟賴殷實華人方足取信若室家遷移則萍蹤靡定虛實難稽是以往澳華人仍准攜帶妻室安土重遷亦難概令挈眷遠徙惟澳內爲地無多華夷雜處若不定以限制恐日致蔓延應將西洋人現有房屋若干戶口若干逐一查明造冊申報已添房屋姑免拆毀不許再行添造寸椽華人挈眷在澳門居住者亦令查明戶口造冊存案止准遷移出澳不許再有增添庶於體恤之中仍寓防閑

之意

一夷船引水人等宜責令澳門同知給發牌照也查各國夷船行抵虎門外洋向係報明澳門同知令引水人帶引進口近年竟有匪徒冒充引水致滋弊竇嗣後夷船到口即令引水先報澳門同知給予印照註明引水船戶姓名由守口營弁驗照放行仍將印照移回同知衙門繳銷如無印照不准進口庶免弊混

一夷商買辦人等宜責成地方官慎選承充隨時嚴察也查夷商所需食用等物因言語不通不能自行採買向設有買辦之人由澳門同知給發印照近年改由粵海關監督給照因監督遠駐省城耳目難周該買辦等惟利是圖恐不免勾通外內商販私買夷貨並代夷人偷售違禁貨物並恐有無照姦民從中影射滋弊嗣後夷商買辦應令澳門同知就近選擇土著殷實之人取具族長保鄰切結



始准承充給與腰牌印照在澳門者由該同知稽查如在黃埔卽交番禺縣就近稽查如敢於買辦食物之外代買違禁貨物及勾通走私舞弊並代雇華人服役查出照例重治其罪地方官徇縱一并查參

一夷船取貨時責令洋行按股交易不准姦夷私行分撥也查夷貨到粵向係行商公同酌議貨物之貴賤均自承辦不致彼此多寡懸殊近年夷商司事者竟隨意分撥售賣內地

行商因其操分撥之權曲意逢迎希圖多分貨物轉售獲利而姦夷遂意爲肥瘠有殷商而少分者有疲商而多撥者以致年帳不清拖欠控追者不一而足嗣後夷貨到時由監督親督洋行總商於公司館內秉公按股籤掣均勻分撥不得任令乏商影射多買虧欠夷帳庶足以昭平允而杜爭端

謹案原議凡六事最後夷船起貨令洋行按股分撥一條經部議駁

粵海關志卷二十八終



